

四庫全書

子部

欽定四庫全書

管子 子部

目錄  
卷一至  
三五

詳校官中書臣徐志晉

編修臣倉聖脈覆勛

總校官進士臣楊懋珩

校對官中書臣李 棻

謄錄監生臣郭洽怡

欽定四庫全書

子部三

管子

法家類

提要

臣等謹案管子二十四卷舊本題管仲撰劉  
恕通鑑外紀引傅子曰管仲之書過半便是  
後之好事所加乃說管仲死後事輕重篇尤  
復鄙俗葉適水心集亦曰管子非一人之筆  
亦非一時之書以其言毛嫱西施吳王好劍

推之當是春秋末年今考其文大抵後人附會多于仲之本書其他姑無論即仲卒於桓公之前而篇中處處稱桓公其不出仲手已無疑義矣書中稱經言者九篇稱外言者八篇稱內言者九篇稱短語者十九篇稱區言者五篇稱雜篇者十一篇稱管子解者五篇稱管子輕重者十九篇意其中孰為手撰孰為記其緒言如語錄之類孰為述其逸事如

家傳之類孰為推其意旨如箋疏之類當時  
必有分別觀其五篇明題管子解者可以類  
推必由後人混而一之致滋疑竇耳晁公武  
讀書志曰劉向所校本八十六篇今七十篇  
考李善註陸機猛虎行曰江遂文釋引管子  
云夫士懷耿介之心不蔭惡木之枝惡木尚  
能恥之况與惡人同處今檢管子近亡數篇  
恐是亡篇之內而遂見之則唐初已非完本

矣明梅士享所刊又復顛倒其篇次如以牧  
民解附牧民篇下形勢解附形勢篇下之類  
不一而足彌為竄亂失真此本為萬曆壬午  
趙用賢所刊稱由宋本翻雕前有紹興己未  
張嶠後跋云舛脫甚衆頗為是正用賢序又  
云正其脫誤者逾三萬言則屢經點竄已非  
劉向所校之舊然終愈于他氏所妄更者在  
近代猶善本也舊有房元齡註晁公武以為

尹知章所託然考唐書藝文志元齡註管子  
不註錄而所載有尹知章註管子三十卷則  
知章本未託名殆後人以知章人徵元齡名  
重改題之以炫俗耳案舊唐書知章絳州翼  
城人神龍初官太常博士睿宗即位拜禮部  
員外郎轉國子博士有孝經註老子註今並  
不傳惟此注藉元齡之名以存其文淺陋頗  
不足采然蔡條鐵圍山叢談載蘇軾蘇轍同

入省試有一題軾不得其出處輒以筆一卓  
而以口吹之軾因悟出管子註則宋時亦採  
以命題試士矣且古來無他註本明劉績所  
補注亦僅小有糾正未足相代故仍舊本錄  
之焉乾隆四十三年三月恭校上

總纂官臣紀昀臣陸錫熊臣孫士毅

總校官臣陸費墀



欽定四庫全書

子部三

管子目錄

法家類

卷一

牧民第一

形勢第二

權修第三

立政第四

乘馬第五

卷二

七法第六

版法第七

卷三

幼官第八

幼官圖第九

五輔第十

卷四

宙合第十一

樞言第十二

卷五

八觀第十三

法禁第十四

重令第十五

卷六

法法第十六

兵法第十七

卷七

大匡第十八

卷八

中匡第十九

小匡第二十

王言第二十一

卷九

霸形第二十二

霸言第二十三

問第二十四

謀失第二十五

卷十

戒第二十六

地圖第二十七

參患第二十八

制分第二十九

君臣上第三十

卷十一

君臣下第三十一

小稱第三十二

四稱第三十三

正言第三十四

卷十二

侈靡第三十五

卷十三

心術上第三十六

心術下第三十七

白心第三十八

卷十四

水地第三十九

四時第四十

五行第四十一

卷十五

勢第四十二

正第四十三

九變第四十四

任法第四十五

明法第四十六

正世第四十七



治國第四十八

卷十六

內業第四十九

封禪第五十

小問第五十一

卷十七

七臣七主第五十二

禁藏第五十三

卷十八

入國第五十四

九守第五十五

桓公問第五十六

度地第五十七

卷十九

地員第五十八

弟子職第五十九

言昭第六十

修身第六十一

問霸第六十二

牧民解第六十三

卷二十

形勢解第六十四

卷二十一

立政九敗解第六十五

版法解第六十六

明法解第六十七

臣乘馬第六十八

乘馬數第六十九

問乘馬第七十

卷二十二

事語第七十一

海王第七十二

國蓄第七十三

山國軌第七十四

山權數第七十五

山至數第七十六

卷二十三

地數第七十七

揆度第七十八

國準第七十九

輕重甲第八十

卷二十四

輕重乙第八十一

輕重丙第八十二

輕重丁第八十三

輕重戊第八十四

輕重己第八十五

輕重庚第八十六

右二十四卷

凡八十六篇

內十篇闕

金史紀事本末

卷三

日錄



管子原序

管子舊書凡三百八十九篇漢劉向校除其重複定著  
為八十六篇今亡十篇近世所傳往往淆亂至不可讀  
余行求古善本庶幾遇之者幾二十年始得之友人秦  
汝立氏其大章僅完整而句字復多亂錯乃為正其脫  
誤者逾三萬言而闕其疑不可考者尚十之二然後管  
子幾為全書夫五伯莫盛於桓公而管仲特為之佐自  
其事羞稱於聖門而其言悉見絀以為權謀功利學者

鮮能道之及余讀是書而深惟其故然後知王者之法莫備於周公而善變周公之法者莫精於管子何者方周之興去隆古沕穆之風未遠而后稷公劉其深仁厚澤又培之於數百年之久蓋風會既啟而文明猶鬱周公起而當制作之任其法制之綢繆文章之繁猥諸所經畫莫不犁然具舉而天下且以鴻龐淳固之俗始嚮利於憲度著明之後故其法雖密而其服習者亦能安之而不悖周室既衰諸侯日尋於干戈謀臣營士競出

其智力以相勝苟必兢兢於先王之約束而執不移等則勢有所格而其術必有所窮非救時之宜矣管子固天下才也豈其智不及此乎是故當其謀之於垂纓下衽之日者不過審舊法擇其善者而從之又其要則在事可以隱令可以寄政使諸侯不吾虞而吾馭安國富民以取盈於天下故其書如牧民乘馬幼官輕重諸篇大抵不離周官以制用而亦不盡局於周官以通其變今攷其說所謂參國為三軍者即伍兩卒旅之舊也因

罰備器用者即兩造兩劑之遺也選士首以好學慈孝而且及於拳勇股肱亦興賢之故典也鑄幣藉以黃金刀布而並及於魚鹽鍼鐵亦園府之舊章也他如五勢三准諸說不過積餘藏羨待之於國諸侯不服吾可以戰諸侯賓服吾可以行仁義蓋周公之法其樊然結約者要以率民於善伸直師其意不襲其故一更之為截然夷易而作民於戰故其言曰精時者少日而功多又曰吾欲正卒伍修甲兵而大國亦將修之吾有攻伐之

器而諸侯有守禦之備是難以速得志此仲之所以立法意也夫白刃捍胷則目不見流矢拔戟加首則十指不辭斷明緩急之有所先也使仲當諸侯力政之日必欲舉王制而井田吾民象刑吾法毋招權勇毋權鹽鐵不踰時而國且飽於敵矣安能以區區之齊仲威海岱而成其一匡之績哉昔者蘇軾氏蓋論仲之變法而曰王者之兵非以求勝故其法繁而曲霸者之兵求以決勝故其法簡而直然則謂仲之用法異於周公之意則

可而謂其法之盡詭於周公則不可故曰古今遞遷道隨時降王霸迭興政由俗草吾以為周公經制之大備蓋所以成王道之終管子能變其常而通其窮亦所以基伯道之始夫亦勢之所趨有不得不然者乎雖然非仲之輕於恃周也當太公之治齊五月而報政曰吾因其俗簡其禮至三年而伯禽之報政周公且訾之曰夫政不簡不易民不有近魯終北面而事齊矣意者太公之治有不盡倣於周官而史蓋稱其通商賈之策便魚

鹽之利人民歸齊齊稱大國蓋自太公而齊故以富彊  
名於列國仲特曰齊之故而修業耳非一無所昉襲而  
創為之者也世之譚者曰帝降而王王降而霸自仲之  
說行一變而入於誇詐之習其末極於秦鞅盡去先王  
之籍而流毒天下遂以管商為功利之首夫商君慘礪  
少恩卒受惡名於秦而仲之政飾四維固六親其論白  
心內業不可謂無窺於聖人之道而徒以刀鋸繩民如  
商君者故雖吾夫子亦且大其功而以如其仁歸之奈

何躋鞅於仲也余憇夫讀是書者不揆其修政立事之  
原而徒辱之以權謀功利使管子之所以善用周公者  
其道不明於天下也故為之梓其書而復論著其大略  
於篇首云萬厯壬午春三月前史官吳郡趙用賢序



管子原序

護左都水使者光祿大夫臣向言所校讐中管子書三百八十九篇大中大夫卜圭書二十七篇臣富參書四十一篇射聲校尉立書十一篇太史書九十六篇凡中外書五百六十四以校除復重四百八十四篇定著八十六篇殺青而書可繕寫也管子者潁上人也名夷吾號仲父少時嘗與鮑叔牙游鮑叔知其賢管子貧困常欺叔牙叔牙終善之鮑叔事齊公子小白管子事公子

糾及小白立為桓公子糾死管仲囚鮑叔薦管仲管仲  
既任政於齊齊桓公以霸九合諸侯一匡天下管仲之  
謀也故管仲曰吾始困時與鮑叔分財多自予鮑叔不  
以我為貪知吾貧也嘗為鮑叔謀事而更窮困鮑叔不  
以我為愚知吾有利有不利也公子糾敗召忽死之吾  
幽囚受辱鮑叔不以我為無耻知吾不羞小節而恥功  
名不顯於天下也生我者父母知我者鮑叔鮑叔既進  
管仲而已下之子孫世祿於齊有封邑者十餘世常為

名大夫管子既相以區區之齊在海濱通貨積財富國  
彊兵與俗同好醜故其書稱曰倉廩實而知禮節衣食  
足而知榮辱上服度則六親固四維不張國乃滅亡下  
令猶流水之原令順人心故論卑而易行俗所欲因子  
之俗所否因去之其為政也善因禍為福轉敗為功貴  
輕重慎權衡桓公怒少姬南襲蔡管仲因伐楚責包茅  
不入貢於周室桓公北征山戎管仲因而令燕修召公  
之政柯之會桓公背曹沫之盟管仲因而信之諸侯歸

之管仲聘於周不敢受上卿之命以讓高國是時諸侯  
為管仲城穀以為之乘邑春秋書之褒賢也管仲富擬  
公室有三歸反沾齊人不以為侈管子卒齊國遵其政  
常彊於諸侯孔子曰微管仲吾其被髮左衽矣太史公  
曰余讀管氏牧民山高乘馬輕重九府詳哉言之也又  
曰將順其美匡救其惡故上下能相親愛豈管仲之謂  
乎九府書民間無有山高一名形勢凡管子書務富國  
安民道約言要可以曉合經義向謹第錄上

春秋尊王不尊霸與中國不與夷狄始于平王避夷難也是王室遷而微也見于周書文侯之命微王也是王者失賞也費誓善其備夷是諸侯之正也秦誓專征伐是諸侯之失禮也書春秋合體而異世也書以文侯之命終其治也春秋以平王東遷始其微也自東遷六十五年春秋無晉以其亡護亂也及其滅中國之國而後見其行事譏失賞也周之微也幸不夷其宗稷齊桓之功也其中國無與加其盛也其夷狄無與抗其力也見

于衛詩美其存中國也春秋無與辭何異也存一國之風無其人則衛夷矣全王道之正與之霸是諸侯可專征伐也夫晉之為霸也異齊遠矣桓正文譎夫桓之為正抑夷狄存中國文之為譎陵中國微王室晉之風也無美其美無功其功外無他焉雖國人不與也然而桓之正非王道之正也以文譎而桓正也桓之功非王道之功也以攘狄而存周也無桓周滅有周桓賊桓卒齊衰楚人滅周周之不幸桓之蚤死也故曰周之存桓之

功也桓之不幸管仲之蚤死也故曰桓之功管仲之力也自是楚滅諸國而熾矣今得其著書然後知攘狄之功皆遠略也儒譏霸信刑賞豈王者詆民哉霸嚴政令豈王者怠忽哉霸鄉方畧豈王者不先謀哉霸審勞逸豈王者暴師哉霸謹蓄積豈王者使民不足哉亦時夷狄內聘大者畏威小者懷仁功亦至矣不幸名之不正然奈哀世何孔子曰微管仲吾其被髮左衽此其據也時大宋甲申秋九月二十三日楊忱序





管子跋

余讀管子然後知莊生鼯錯董生之語時出於管子也  
不獨此耳凡漢書語之雅馴者率多本管子管子天下  
之奇文也所以著見於天下後世者豈徒其功烈哉及  
讀心術上下白心內業諸篇則未嘗不廢書而歎益知  
其功業之所本然後知世之知管子者殊淺也管子書  
多古字如專作搏忒作貳宥作侑況作兄釋作澤此類  
甚衆大匡載召忽語曰百歲之後吾君卜世犯吾君命

而廢吾所立奪吾糾也雖得天下吾不生也兄與我齊國之政也而注乃謂召忽呼管仲為兄曰澤命不渝而注乃以為澤恩之命甚陋不可徧舉書既雅奧難句而為之注者復繆於訓故益使後人疑惑不能究知世傳房玄齡所注者非是予求管子書久矣紹興己未乃從人借得之伏而讀者累月始頗窺其義訓然舛脫甚衆其所未解尚十二三用上下文義及參以經史訓故頗為是正其訛謬疑者表而發之其所未解者置之不敢以意

穿鑿也既又取其間奧於理切於務者抄而藏於家將  
得善本而卒業焉張嶠跋



欽定四庫全書

管子卷一

唐房玄齡注

牧民第一

國頌 四維 四順 士經 六親 五法

經言一

凡有地牧民者務在四時

四時所以生 成萬物也

守在倉廩

食者人之

也國多財則遠者來地辟舉則民留處

舉盡也言地盡 關則人留而安

也居處

倉廩實則知禮節衣食足則知榮辱上服度則六

親固

服行也上行禮度則六親各 得其所致能感恩而結固之

四維張則君令行故

省刑之要在禁文巧

文巧者刑罰所由生

守國之度在飾四維順

民之經在明鬼神祇山川

鬼神山川皆有尊卑之序故敬明之

敬宗廟恭

祖舊

謂恭承先祖之舊法

不務天時則財不生不務地利則倉廩

不盈野蕪曠則民乃管

管當為姦

上無量則民乃妄文巧不

禁則民乃淫不璋兩原則刑乃繁

璋當為章章明也兩原謂妄之原上無量

也淫之原不禁文巧也能明此法者刑簡

不明鬼神則陋民不悟

不悟鬼神有尊卑之

異也不祗山川則威令不聞

言能登封降禪祇祀山川則威令遠聞

不敬宗

廟則民乃上枝

枝效也君無所尊人亦效之

不恭祖舊則孝悌不備

四維不張國乃滅亡

右國頌

頌容也謂陳  
為國之形容

國有四維一維絕則傾二維絕則危三維絕則覆四維  
絕則滅傾可正也危可安也覆可起也滅不可復錯也

何謂四維一曰禮二曰義三曰廉四曰恥禮不踰節義

不自進

自進謂不  
由薦舉也

廉不蔽惡

隱蔽其惡  
非貞廉也

恥不從枉

詭隨  
邪枉

無羞  
之人

故不踰節則上位安不自進則民無巧詐不蔽惡

則行自全不從枉則邪事不生

右四維

政之所興在順民心政之所廢在逆民心民惡憂勞我  
佚樂之民惡貧賤我富貴之民惡危墜我存安之民惡

滅絕我生育之能佚樂之則民為之憂勞

君於平康能  
佚樂人及其

危人必為之憂  
勞下三順皆然

能富貴之則民為之貧賤能存安之則

民為之危墜能生育之則民為之滅絕故刑罰不足以

畏其意殺戮不足以服其心

畏意服心在於順其  
所欲不在刑罰殺戮

故刑

罰繁而意不恐則令不行矣殺戮衆而心不服則上位



危矣故從其四欲則遠者自親行其四惡則近者叛之  
故知予之為取者政之寶也

謂與之生全  
取其死難也

### 右四順

錯國於不傾之地積於不涸之倉

涸竭也

藏於不竭之府

下令於流水之原使民於不爭之官明必死之路開必  
得之門不為不可成不求不可得不處不可久不行不  
可復錯國於不傾之地者授有德也積於不涸之倉者  
務五穀也藏於不竭之府者養桑麻育六畜也下令於

流水之原者令順民心也使民於不爭之官者使各為

其所長也

各長其所長則順而悅故不爭也

明必死之路者嚴刑罰也

開必得之門者信慶賞也不為不可成者量民力也不

求不可得者不彊民以其所惡也不處不可久者不偷

取一世也

謂所處可必使百代常行

不行不可復者不欺其民也

復重

也欺民之事不可重行也

故授有德則國安務五穀則食足養桑麻

育六畜則民富令順民心則威令行使民各為其所長

則用備嚴刑罰則民遠邪信慶賞則民輕難量民力則

事無不成不彊民以其所惡則詐偽不生不偷取一世則民無怨心不欺其民則下親其上

右士經

士事也經常也謂陳事之可以常行者也

以家為鄉鄉不可為也

言有家之親斥以為鄉之疎必生怨故不可為也下三事同此

以鄉為國國不可為也以國為天下天下不可為也以

家為家

一親也

以鄉為鄉

二親也

以國為國

三親也

以天下為

天下

四親也

母曰不同生遠者不聽

謂家也言有家之親而謂之曰不與汝同

家而生用此以相疎遠者必不聽下同

母曰不同鄉遠者不行母曰不同

國遠者不從如地如天何私何親

五親也

如月如日唯君

之節

六親也天地日月取其耀臨言人君親下當如天地日月之無私也

御民之轡在上

之所貴

言人從上之所貴若馬之從轡

道民之門在上之所先

上所先行人必

行之其從之若由門矣

召民之路在上之所好惡故君求之則臣

得之

君將求之臣已先索得之也

君嗜之則臣食之君好之則臣服

之君惡之則臣匿之

一法也

毋蔽汝惡毋異汝度

汝君也賢

者將不汝助言室滿室言堂滿堂是謂聖王

二法也言堂室事而

令滿取其露見不隱也

城郭溝渠不足以固守兵甲彊力不足以

應敵博地多財不足以有衆

言城郭兵甲博地不足以固守應敵有衆其固守應

敵有衆更在有道者也

惟有道者能備患於未形也故禍不萌

三法

也天下不患無臣患無君以使之天下不患無財患無

人以分之

可以分與財者賢人也

故知時者可立以為長無私者

可置以為政審於時而察於用而能備官者可奉以為

君也

四法也

緩者後於事去於財者失所親信小人者失

士

五法也

右六親五法

形勢第二

自天地以及萬物闢諸人事莫不有形勢焉夫勢必因形而立故形端者勢必

直狀危者勢必傾觸類莫不然可以一隅而反

經言二

山高而不崩則祈羊至矣淵深而不涸則沈玉極矣

至極

也山不崩淵不涸與雨之祥故羊玉而祈祭烹羊以祭故曰祈羊

天不變其常地不易

其則春秋冬夏不更其節古今一也

今之天地即古之天地今之四時即

古之四時故曰古今一也

蛟龍得水而神可立也虎豹得幽而威可

載也

至德處盛位天下可乎載行也

風雨無鄉而怨怒不及也

鄉方也既無方

所故無從而怨怒也

貴有以行令賤有以忘卑

貴而行令可移賤而忘卑可移

壽夭貧富無徒歸也

皆有理在焉

銜命者君之尊也受辭者

名之運也

言受君之辭以出命則名必運運行也

上無事則民自試

試用也

抱蜀不言而廟堂既脩

抱持也蜀祠器也君人者但抱祠器以身率道雖復靜默不言

廟堂之政既以脩理矣

鴻鵠銜銜唯民歌之

感德化也

濟濟多士殷民

化之紂之失也

戒紂之失故化文王

飛蓬之問不在所賓燕雀之

集道行不顧

蓬飛因風動搖不定喻二三之聲問明主所不賓敬燕雀翔集事之常細也故行道

之人忽而不顧謂小事非大人所宜知

犧拴圭璧不足以饗鬼神

鬼神享德不在

圭璧主功有素寶幣奚為

主能立功可謂有素有素則諸侯不敢犯寶玉幣帛何所為乎

羿之道非射也造父之術非馭也奚仲之巧非斲削也

羿之射貴其肆武服戎不在其落烏中鵠造父之馭貴其軍容致遠不在轍跡徧天下也奚仲之巧貴其九車

以載不在斲削成光鑑也 召遠者使無為馬親近者言無事馬唯夜

行者獨有也 遠使無為所以優遠方也親於近者貴於思厚不在於虛言夜行謂陰行其德則人

不與之爭故獨有之也 平原之隰奚有於高 言平原之澤雖有小封不成於高喻人有

大失小善不成其美隰下澤也 大山之隈奚有於深 隈山曲也言山既大矣雖有小隈不

成為深喻人有高行雖有小過非不肖也 訾讐之人勿與任大 訾毀賢讐譽惡也如此之

人則亂大邦也 讒臣者可以遠舉 言行莫先謂之讒臣有大言行者可與圖國之遠也 顧



憂者可與致道

顧憂謂忠事勤臣道有如此者可致於道者也

其計也速而憂

在近者往而勿召也

小人之計得之雖速禍敗尋至則憂及之此人親近推之令去不須

也舉長者可遠見也

舉用長利衆皆見之故曰遠見

裁大者衆之所比

也裁斷也能斷大事衆必比之

美人之懷定服而勿厭也

欲令人貴美而懷歸

者須安定服行道德勿有疲厭

必得之事不足賴也必諾之言不足信

也

言人於事莫為疑動言必得應諾如此虛誕者耳不足賴信也

小謹者不大立嘗食

者不肥體

言人無弘量但有小謹不能大立也嘗惡也惡食之人憂嫌致瘠故不能肥體

有無

棄之言者必參於天地也

言無可棄動為法則若天地之無不容載故曰參之天地

墜岸三仞人之所大難也而猿猴飲焉故曰伐矜好專

舉事之禍也

猿遇墜岸而能飲喻智者逢禍而能息也

不行其野不違其馬

馬有識道之性不違馬而自得途喻未經其事問其所經能予而無取者天地之配

也

天地施生不求所報與而不取可以配天地也

怠倦者不及

倦怠之人觸塗廢滯故多不及

無廣者疑神神者在內不及者在門

無得以已及不及疑神不神神雖無

形常在於內故曰在內也

在內者將假在門者將待

將假

謂神將借已也待謂頤自厲以待

曙戒勿怠後穉逢殃

每曙而戒所以戒此日之事以

待曙戒戒勿為倦怠也

朝忘其事夕失其功邪氣入內正色乃衰

君不君則臣不臣父不父則子不子上失其位則下踰其節上下不和令乃不行衣冠不正則賓者不肅進退

無儀則政令不行且懷且威則君道備矣莫樂之則莫

哀之

常能樂人及其有難人必哀之也

莫生之則莫死之

常能生人及其有危人必

死之往者不至來者不極

此往情不至則彼來意不極也

道之所言者一

也而用之者異

道之所言其理不二但用之不同其事遂異也

有聞道而好為

家者一家之人也

雖聞道但好理家此但一家之人耳言無廣遠

有聞道而好

為鄉者一鄉之人也有聞道而好為國者一國之人也

有聞道而好為天下者天下之人也

此亦仁者見之謂之仁智者見之謂

之智也

有聞道而好定萬物者天下之配也

此則君子道體斯道也

往者其人莫來道來者其人莫往道之所設身之化也

道者均彼我忘是非故無來往之體然道之所設身必與之化也

持滿者與天安危者

與人失天之度雖滿必涸上下不和雖安必危

能持滿者則與

天合能安危者則與人合不合於天雖滿必涸不合於人雖安必危

欲王天下而失天之

道天下不可得而王也得天之道其事若自然失天之

道雖立不安其道既得莫知其為之其功既成莫知其

釋之藏之無形天之道也疑今者察之古不知來者視

之往萬事之生也異趣而同歸古今一也生棟覆屋怨

怒不及弱子下瓦慈母操箠

言人以生棟造舍雖至覆屋但自咎而已不敢怨及

他人至弱子下瓦所損不多慈母便操箠而怒之喻人主過由已作雖大而吞聲過發他人雖小而振怒也

天道之極遠者自親

天道平分遠近無二故遠者自親也

人事之起近親

造怨

人事則愛惡相攻故有近親造怨也

萬物之於人也無私近也無私

遠也

動物則有識而無知植物則有生而無識故於人也無私遠近

巧者有餘而拙者

不足

萬物既無私於人故巧者用之有餘拙者用之不足

其功順天者天助之其

功逆天者天違之天之所助雖小必大天之所違雖成必敗順天者有其功逆天者懷其凶不可復振也烏鳥

之狡雖善不親

狡謂猜也言烏鳥之性多猜初雖相善後終不親

不重之結雖

固必解道之用也貴其重也母與不可母彊不能母告

不知與不可彊不能告不知謂之勞而無功見與之交

幾於不親

見謂不忘而恃之也與親與也

見哀之役幾於不結

役而哀之雖有

惻然見而不忘故彼不結也

見施之德幾於不報

雖有恩施之德然見而不忘故彼不

報也四方所歸心行者也

心行能不見則四方歸之

獨王之國勞而多

禍獨王謂無四鄰之援也獨國之君卑而不威自媒之女醜而不

信未之見而親焉可以往矣未見而親親必無終故可往矣久而不忘

焉可以來矣日月不明天不易也山高而不見地不易

也日月無不明假令不明是天有雲氣而不易也山高無不見假令不見是地多險阻不平易也言而

不可復者君不言也行而不可再者君不行也謂臣有忠言不

可復言者則由君不言故也臣有善行不可再行者則由君不行故也凡言而不可復行而

不可再者有國者之大禁也

### 權修第三

權者所以知輕重也君人者必知事之輕重然後國可為故須修權

經言三

萬乘之國兵不可以無主

無所主則無所統一也

土地博大野不

可以無吏

無吏則不厲於壑闕

百姓殷衆官不可以無長

無長則無所稟

也今操民之命朝不可以無政地博而國貧者野不辟也

民衆而兵弱者民無取也

兵無主故無所取則

故末產不禁則野

不辟賞罰不信則民無取野不辟民無取外不可以應

敵內不可以固守故曰有萬乘之號而無千乘之用而

求權之無輕不可得也

國號萬乘及其兵用不滿於千如此者權必自輕也

地辟

而國貧者舟輿飾臺榭廣也賞罰信而兵弱者輕用衆



使民勞也舟車飾臺榭廣則賦斂厚矣輕用衆使民勞則民力竭矣賦斂厚則下怨上矣民力竭則令不行矣下怨上令不行而求敵之勿謀已不可得也欲為天下

者必重用其國欲為其國者必重用其民欲為其民者

必重盡其民力

重為矜惜之也

無以畜之則往而不可止也

往謂

亡去也

無以牧之則處而不可使也

人雖留處無畜牧之道故不可使也

遠

人至而不去則有以畜之也民衆而可一則有以牧之也見其可也喜之有徵

徵驗也必有恩錫以驗見喜無空然矣

見其不可

也惡之有刑賞罰信於其所見雖其所不見其敢為之

乎

所見之處賞罰既信則所不見懼而從教不敢為非

見其可也喜之無徵見其

不可也惡之無刑賞罰不信於其所見而求其所不見

之為之化不可得也厚愛利足以親之明智禮足以教

之上身服以先之

服行也凡所欲教人在上必身自行之所以率先於下也

審度量

以閑之

所以防閑其姦偽也

鄉置師以說道之然後申之以憲令

勸之以慶賞振之以刑罰

振整也

故百姓皆說為善則暴

亂之行無由至矣地之生財有時民之用力有倦而人

君之欲無窮以有時與有倦養無窮之君而度量不生

於其間

度量不生則賦役無限也

則上下相疾也

上疾下之不供下疾上之無窮

是

以臣有弑其君子有弑其父者矣故取於民有度用之有止國雖小必安取於民無度用之不止國雖大必危地之不辟者非吾地也民之不牧者非吾民也凡牧民者以其所積者食之不可不審也其積多者其食多其積寡者其食寡無積者不食或有積而不食者則民離上有積多而食寡者則民不力有積寡而食多者則民

多詐有無積而徒食者則民偷幸故離上不力多詐偷

幸舉事不成應敵不用故曰察能授官班祿賜予使民

之機也野與市爭民

民務本業則野與市爭民

家與府爭貨

下務藏積則家

與府爭貨

金與粟爭貴

所寶惟穀故金與粟爭貴

鄉與朝爭治

官各務其職故鄉與

朝爭治

故野不積草農事先也府不積貨藏於民也市不

成肆家用足也朝不合衆鄉分治也故野不積草府不

積貨市不成肆朝不合衆治之至也人情不二故民情

可得而御也審其所好惡則其長短可知也觀其交游

則其賢不肖可察也二者不失則民能可得而官也

二者

謂好惡  
交游也

地之守在城城之守在兵兵之守在人人之守

在粟故地不辟則城不固有身不治奚待於人

待謂將  
治之言

身既不能自治  
則無以治人也

有人不治奚待於家有家不治奚待於

鄉有鄉不治奚待於國有國不治奚待於天下天下者

國之本也國者鄉之本也鄉者家之本也家者人之本

也人者身之本也身者治之本也故上不好本事則末

產不禁末產不禁則民緩於時事而輕地利輕地利而

求田野之辟倉廩之實不可得也商賈在朝則貨財上

流

若桓靈之賣官也

婦言人事則賞罰不信

婦者所以職其蠶織此之不為輒言

人事婦人之性險

故賞罰不信矣男女無別則民無廉恥貨財上流賞

罰不信民無廉恥而求百姓之安難兵士之死節不可

得也朝廷不肅貴賤不明長幼不分度量不審衣服無

等上下凌節而求百姓之尊主政令不可得也上好詐

謀間欺

間隔也有所隔礙而欺誑也

臣下賦斂競得使民偷壹

偷取一時

快之則百姓疾怨而求下之親上不可得也有地不務本

事本事

君國不能壹民而求宗廟社稷之無危不可得

也上恃龜筮好用巫鑿則鬼神驟崇故功之不立名之

不章為之患者三

苟功不立名不章必為三患  
下獨王負賤日不足是也

有獨王

者謂無黨也

有貧賤者有日不足者

有日不足之費也

一年之計莫

如樹穀十年之計莫如樹木終身之計莫如樹人

樹人謂濟

而成

一樹一穫者穀也一樹十穫者木也

果木過十年漸就枯悴故

曰十

一樹百穫者人也

人有百年之壽雖使無百年子孫亦有嗣之而報德者故曰百

獲我苟種之如神用之

一種百獲近識者莫能測其由故曰如神用也

舉事如

神唯王之門

王者貴神  
道設教也

凡牧民者使士無邪行女無淫

事士無邪行教也女無淫事訓也教訓成俗而刑罰省

數也

所角  
反

凡牧民者欲民之正也欲民之正則微邪不

可不禁也微邪者大邪之所生也微邪不禁而求大邪  
之無傷國不可得也凡牧民者欲民之有禮也欲民之  
有禮則小禮不可不謹也小禮不謹於國而求百姓之  
行大禮不可得也凡牧民者欲民之有義也欲民之有  
義則小義不可不行小義不行於國而求百姓之行大



義不可得也凡牧民者欲民之有廉也欲民之有廉則小廉不可不修也小廉不修於國而求百姓之行大廉不可得也凡牧民者欲民之有恥也欲民之有恥則小恥不可不飾也小恥不飾於國而求百姓之行大恥不可得也凡牧民者欲民之修小禮行小義飾小廉謹小恥禁微邪此厲民之道也民之修小禮行小義飾小廉謹小恥禁微邪治之本也凡牧民者欲民之可御也欲民之可御則法不可不審法者將立朝廷者也將立朝

廷者則爵服不可不貴也爵服加于不義則民賤其爵  
服民賤其爵服則人主不尊人主不尊則令不行矣法  
者將用民力也將用民力者則祿賞不可不重也祿  
賞加于無功則民輕其祿賞民輕其祿賞則上無以勸  
民上無以勸民則令不行矣法者將用民能也將用  
民能者則授官不可不審也授官不審則民間其治民  
間其治則理不上通理不上通則下怨其上下怨其上  
則令不行矣法者將用民之死命者也用民之死命者

則刑罰不可不審刑罰不審則有辟就有辟就有辟就則殺不辜而赦有罪殺不辜而赦有罪則國不免於賊臣矣故夫爵服賤祿賞輕民間其治賊臣首難此謂敗國之教也

### 立政第四

三本  
省官

四固  
服制

五事  
九敗

首憲  
七觀

首事

經言四

國之所以治亂者三殺戮刑罰不足用也

三謂三本也  
謂治亂法各

有三國之所以安危者四城郭險阻不足守也

四謂四固國

之所以富貧者五輕稅租薄賦斂不足恃也

五謂五事治國

有三本而安國有四固而富國有五事五事五經也

自三

本已上  
總其目

君之所審者三一曰德不當其位二曰功不當

其祿三曰能不當其官此三本者治亂之原也故國有  
德義未明於朝者則不可加于尊位功力未見于國者  
則不可授以重祿臨事不信於民者則不可使任大官故  
德厚而位卑者謂之過德薄而位尊者謂之失寧過於  
君子而毋失於小人過於君子其為怨淺失於小人其  
為禍深是故國有德義未明於朝而處尊位者則良臣

不進有功力未見於國而有重祿者則勞臣不勸有臨  
事不信於民而任大官者則材臣不用三本者審則下  
不敢求三本者不審則邪臣上通而使辟制威如此則  
明塞於上而治壅於下正道捐棄而邪事日長三本者  
審則使辟無威於國道塗無行禽無禽獸之行疏遠無蔽獄  
孤寡無隱治故曰刑省治寡朝不合衆

右三本

君之所慎者四一曰大德不至仁不可以授國柄

德雖大而

仁不至或包藏禍心故不可授國柄

二曰見賢不能讓不可與尊位三曰

罰避親貴不可使主兵四曰不好本事不務地利而輕賦斂不可與都邑此四務者安危之本也故曰卿相不得衆國之危也大臣不和同國之危也兵主不足畏國之危也民不懷其產國之危也故大德至仁則操國得衆見賢能讓則大臣和同罰不避親貴則威行於鄰敵好本事務地利重賦斂則民懷其產

右四固

君之所務者五。一曰山澤不救於火，草木不植成國之貧也。二曰溝瀆不遂於隘，郵水不安其藏，國之貧也。三曰桑麻不植於野，五穀不宜其地，國之貧也。四曰六畜不育於家，瓜瓠葷菜百果不備，具國之貧也。五曰工事競於刺鏤，女事繁於文章，國之貧也。故曰：山澤救於火，草木植成國之富也。溝瀆遂於隘，郵水安其藏，國之富也。桑麻植於野，五穀宜其地，國之富也。六畜育於家，瓜瓠葷菜百果備，具國之富也。工事無刺鏤，女事無文章。

國之富也

右五事

分國以為五鄉鄉為之師分鄉以為五州州為之長分州以為十里里為之尉分里以為十游游為之宗十家為什五家為伍什伍皆有長馬築障塞匿匪一道路博

出入審閭閉慎筦鍵筦藏于里尉置閭有司以時開閉

閭有司觀出入者以復于里尉復凡出入不時衣服不

中圍屬

羊豕之類也

羣徒

衆作役也

不順於常者閭有司見之復



無時若在長家子弟臣妾屬役賓客則里尉以譙于游

宗游宗以譙于什伍什伍以譙于長家譙敬而勿復既

能敬而從命無事  
可白則是教令行一再則宥三則不赦凡孝弟忠信賢

良雋材若在長家子弟臣妾屬役賓客則什伍以復于

游宗游宗以復于里尉里尉以復于州長州長以計于

鄉師鄉師以著于士師凡過黨其在家屬及于長家其

在長家及于什伍之長其在什伍之長及于游宗其在

游宗及于里尉其在里尉及于州長其在州長及于鄉

師其在鄉師及于士師三月一復六月一計十二月一

著凡上賢不過等

謂上賢雖才用絕倫無得過其勞級

使能不兼官罰有

罪不獨及

罪必有首從及黨與也

賞有功不專與孟春之朝君自

聽朝論爵賞拔官終五日季冬之夕君自聽朝論罰罪

刑殺亦終五日正月之朔百吏在朝君乃出令布憲于

國五鄉之師五屬大夫皆受憲于太史大朝之日五鄉

之師五屬大夫皆身習憲于君前太史既布憲入籍于

太府

入籍者入取籍於太府也

憲籍分于君前五鄉之師出朝遂于

鄉官致于鄉屬及于游宗皆受憲

憲所以察時令籍所以視功過

憲既

布乃反致令焉

致令于君

然後敢就舍憲未布令未致不敢

就舍就舍謂之留令死罪不赦五屬大夫皆以行車朝

出朝不敢就舍遂行至都之日

五屬之部

遂於廟致屬吏皆

受憲憲既布乃發使者致令以布憲之日蚤晏之時憲

既布使者以發然後敢就舍憲未布使者未發不敢就

舍就舍謂之留令罪死不赦憲既布有不行憲者謂之

不從令罪死不赦考憲而有不合于太府之籍者侈曰

專制不足曰虧令罪死不赦首憲

歲朝之憲

既布然後可以

布憲

憲謂月朝之憲

### 右首憲

凡將舉事令必先出曰事將為其賞罰之數必先明之  
立事者謹守令以行賞罰計事致令復賞罰之所加有  
不合于令之所謂者雖有功利則謂之專制罪死不赦  
首事既布然後可以舉事

### 右首事

修火憲敬山澤林藪積草夫財之所出以時禁發焉使  
民於宮室之用薪蒸之所積虞師之事也決水潦通溝  
瀆修障防安水藏使時水雖過度無害于五穀歲雖凶  
早有所粉扶門反穫司空之事也相高下視肥瘠觀地宜

明詔期前後農夫以時鈞修焉使五穀桑麻皆安其處  
由田之事也行鄉里視宮室觀樹藝簡六畜以時鈞修  
焉勸勉百姓使力作毋偷懷樂家室重去鄉里鄉師之  
事也論百工審時事辨功苦上完利監壹五鄉以時鈞

修馬使刻鏤文采毋敢造于鄉工師之事也

右省官

度爵而制服量祿而用財飲食有量衣服有制宮室有  
度六畜人徒有數舟車陳器有禁脩生則有軒冕服位  
穀祿田宅之分死則有棺槨絞衾壙壟之度雖有賢身  
貴體毋其爵不敢服其服雖有富家多資毋其祿不敢  
用其財天子服文有章而夫人不敢以燕以饗廟將軍  
大夫以朝官吏以命士止于帶緣散民不敢服襍采百

工商賈不得服長鬣

求圖反

貂刑餘戮民不敢服綬

一本作絲

不敢畜連乘車

### 右服制

寢兵之說勝則險阻不守

言事者競陳寢兵其說見用而得勝則武術必偃雖有險

阻不能守矣

兼愛之說勝則士卒不戰

兼愛之說勝則徐偃弱而行仁宋襄惑而

慕古也

全生之說勝則廉恥不立

全生之說勝則王孫自奉千金何侯日食一萬

私議自貴之說勝則上令不行羣徒比周之說勝則賢不肖不分金玉貨財之說勝則爵服下流觀樂玩好之

說勝則姦民在上位

觀樂玩好之說勝則費仲以奉奇異而居顯位董賢以柔曼而處朝

也謂請謁任舉之說勝則繩墨不正諂諛飾過之說勝則

巧佞者用

右九敗

期而致使而往百姓舍己以上為心者教之所期也始於不足見終於不可及一人服之萬人從之訓之所期也

也

謂君將行令始獨發於心故不足見終則功成事遂故不可及也

未之令而為未之

使而往上不加勉而民自盡竭俗之所期也

君既盡心於俗所以



能期於心也

好惡形於心百姓化於下罰未行而民畏恐賞

未加而民勸勉誠信之所期也

君之好惡纒形於心百姓已化於天下

為

而無害成而不議得而莫之能爭天道之所期也

君能奉順

天道所以能期於此

為之而成求之而得上之所欲小大必舉事

之所期也令則行禁則止憲之所及俗之所被

被合也謂俗與

合憲如百體之從心政之所期也

### 右七觀

乘馬第五

立國大數士農工商

陰陽爵位務市事聖人失時地里

經言五

凡立國都非於大山之下必於廣川之上高毋近旱而  
水用足下毋近水而溝防省因天材就地利故城郭不  
必中規矩道路不必中準繩

### 右立國

無為者帝為而無以為者王為而不貴者霸不自以為  
所貴則君道也貴而不過度則臣道也

### 右大數

地者政之本也

政從地生

朝者義之理也

義因朝起

市者貨之準

也市所以準黃金者用之量也諸侯之地千乘之國者

器之制也五者其理可知也為之有道地者政之本也

是故地可以正政也地平可地不平均和調則政不可

正也不均平和調則地利或政不正則事不可理也

春秋冬夏陰陽之推移也夏秋推陽以生陰時之短長

陰陽之利用也必長短相摩然後日夜之易陰陽之化

也晝熱夜寒交易其然則陰陽正矣雖不正有餘不可

損不足不可益也假令時有盈縮不正則百六之運數

當然也雖有堯湯之聖不能免之故

不可損益也

天地莫之能損益也

天地亦準陰陽不可損益也

然則可以

正政者地也故不可不正也正地者其實必正長亦正

短亦正小亦正大亦正長短大小盡正正不正則官不

理

謂天地之正不正官不可得理

官不理則事不治事不治則貨不多

是故何以知貨之多也曰事治何以知事之治也曰貨

多貨多事治則所求於天下者寡矣為之有道

右陰陽

按此釋地者政之本也

朝者義之理也是故爵位正而民不怨民不怨則不亂

然後義可理理不正則不可以治而不可不理也故一

國之人不可以皆貴皆貴則事不成而國不利也

皆貴則無

為事者故事不成也

為事之不成國之不利也使無貴者則民不

能自理也是故辨於爵列之尊卑則知先後之序貴賤之義矣為之有道

右爵位

按此釋朝者義之理也

市者貨之準也是故百貨賤則百利不得

謂不得過常之利也

百

利不得則百事治百事治則百用節矣是故事者生於

慮

謀慮則事生也

成於務

專務則事成也

失於傲

輕傲則失事也

不慮則不生

不務則不成不傲則不失故曰市者可以知治亂可以知多寡而不能為多寡為之有道

右務市事

按此釋市者貨之準也

黃金者用之量也辨於黃金之理則知侈儉知侈儉則百用節矣故儉則傷事侈則傷貨儉則金賤金賤則事不成故傷事侈則金貴金貴則貨賤故傷貨貨盡而後知不足是不知量也事已而後知貨之有餘是不知節

也不知量不知節不可謂之有道天下乘馬服牛而任之輕重有制有壹宿之行

一宿有定準則百宿可知也

道之遠近有

數矣是知諸侯之地千乘之國者所以知地之小大也所以知任之輕重也重而後損之是不知任也輕而後益之是不知器也不知任不知器不可謂之有道地之不可食者山之無木者百而當一涸澤百而當一地之無草木者百而當一樊棘雜處民不得入焉百而當一藪蕪纏得入焉九而當一蔓山其木可以為材可以為

軸斤斧得入馬九而當一汎山其木可以為棺可以為  
車斤斧得入馬十而當一流水網罟得入馬五而當一  
林其木可以為棺可以為車斤斧得入馬五而當一澤  
網罟得入馬五而當一命之曰地均以實數方六里命之  
曰暴五暴命之曰部五部命之曰聚聚者有市無市  
則民乏五聚命之曰某鄉四鄉命之曰方官制也官成  
而立邑五家而伍十家而連五連而暴五暴而長命之  
曰某鄉四鄉命之曰都邑制也邑成而制事四聚為一



離五離為一制五制為一田二田為一夫三夫為一家  
事制也事成而制器方六里為一乘之地也一乘者四

馬也一馬其甲七其蔽五

蔽所以  
捍車馬

四乘其甲二十有八

其蔽二十白徒三十人奉車兩器制也方六里一乘之  
地也方一里九夫之田也黃金一鎰百乘一宿之盡也

無金則用其絹季絹三十三

三等其下  
者曰季

制當一鎰無絹

則用其布經暴布百兩當一鎰一鎰之金食百乘之一  
宿則所市之地六步一斛

一本作  
一升

命之曰中歲有市無

市則民不乏矣方六里名之曰社有邑馬名之曰央亦

關市之賦

命出關市之賦

黃金百鎰為一筐其貨一穀籠為十

筐其商苟在市者三十人其正月十二月黃金一鎰命

之曰正分春曰書比立夏曰月程秋曰大稽與民數得

亡三歲修封五歲修界十歲更制經正也十仞見水不

大潦

大潦一本作大續繼也預貯水也

五尺見水不大旱十一仞見水

輕征

征稅也

十分去二三

謂去十仞之二三

二則去三四

謂去十仞之三

四則去四

謂去十仞之四

五則去半比之于山五尺見水

言平地五

初見水同於十分去一四則去三八尺曰仞分九仞則

山五尺見水屈每分有二仞二尺去其三則餘三則去二二則去一三尺而見水比之於

澤績曰言地高則難澇故曰十仞見水不大澇地低則

難旱故曰五尺見水不大旱當澇之時若高亢地十

一仞見水則常征十分中免二三分十二仞見水則免

三四分十四仞見水則免四分十五仞見水則免五分

以其極高難灌溉可以比於山也當旱之時若汙下地

五尺見水則常征十分免四分四尺見水則免三分三

尺見水則免二分二尺見水則免一分以其極低易灌

溉可以比於澤也十分去一當作十分去四乃字之誤

距國門以外窮四竟之內丈夫二犁童五尺一犂以為

三日之功正月令農始作服于公田農耕及雪釋耕始

馬芸卒馬士聞見博學意察而不為君臣者與功而不

與分焉

此人學以為君之臣也然以高尚其事而不為若此者預食農收之功而不受力作之分也

賈知賈之貴賤日至於市而不為官賈者與功而不與

分焉工治容貌功能日至於市而不為官工者與功而

不與分焉不可使而為工則視貨離之實而出夫粟是

故智者知之愚者不知不可以教民

教民必以有智者

巧者能

之拙者不能不可以教民

教人為工必以巧者欲令愚智之人盡曉知之然後可以

教人非一令而民服之也不可以為大善非夫人能之也

也不可以為大功是故非誠賈不得食于賈非誠工不得食于工非誠農不得食于農非信士不得立于朝是故官虛而莫敢為之請君有珍車珍甲而莫之敢有君舉事臣不敢誣其所不能君知臣臣亦知君知已也故臣莫敢不竭力俱操其誠以來道曰均地分力使民知時也民乃知時日之蚤晏日月之不足飢寒之至于身也是故夜寢蚤起父子兄弟不忘其功為而不倦民不憚勞苦故不均之為惡也地利不可竭民力不可殫不

告之以時而民不知不道之以事而民不為與之分貨則民知得正矣審其分則民盡力矣是故不使而父子兄弟不忘其功

右士農工商

按此篇言均地立制定賦之法率民盡地力終之以人君出令之事未又言均

地分力使民知時為下三節之網謂之士農工商不知何說

聖人之所以為聖人者善分民也

善令人知分故名為聖人

聖人不

能分民則猶百姓也於已不足安得名聖

不能令人知分則已尚不

足何名為聖人

是故有事則用人

用謂人也

無事則歸之於民

謂令人退歸而

居唯聖人為善託業於民謂託人以成功業也民之生也辟則愚

縱其淫辟則昏愚也類善也閉其淫辟則自善上為一下為二下之效上必倍

也之

右聖人

按此釋上分力

時之處事精矣不可藏而舍也

時至則為之不可藏而捨息也

故曰今

日不為明日亡貨

言不為則失時

昔之日已往而不來矣

言日既往

不還來也

右失時

按此釋上使民知時

上地方八十里萬室之國一千室之都四中地方百里  
萬室之國一千室之都四下地方百二十里萬室之國  
一千室之都四以上地方八十里與下地方百二十里  
通於中地方百里

右地里

按此釋  
上均地

管子卷一



欽定四庫全書

管子卷二

唐 房玄齡 注

七法第六

謂則象法化決  
塞心術計數

經言六

言是而不能立言非而不能廢

謂之是不能立其人而  
用之謂之非不能廢其

人而  
退之

有功而不能賞有罪而不能誅若是而能治民者

未之有也是必立非必廢有功必賞有罪必誅若是安

治矣未也

能此四者可以安治矣而  
猶未者則以未具下事故

是何也曰形勢器

械未具猶之不治也形勢器械具四者備治矣

四者備謂立是

廢非賞功誅罪

不能治其民而能彊其兵者未之有也

能治民然後能

彊能治其民矣而不明于為兵之數猶之不可

雖能治民而欲

彊兵必明於為兵之數然後可

不能彊其兵而能必勝敵國者未之有

也能彊其兵而不明于勝敵國之理猶之不勝也

雖能彊兵

其欲勝敵國必須明審其理之不明猶是不勝也

兵不必勝敵國而能正天下

者未之有也兵必勝敵國矣而不明正天下之分猶之

不可故曰治民有器為兵有數勝敵國有理正天下有

分

器數理分即下之七法也

則象法化決塞心術計數

此七法之目也

根天

地之氣寒暑之和水土之性人民鳥獸草木之生物雖

不甚多皆均有焉而未嘗變也謂之則

根元也生萬物者天地之元氣

也義也名也時也似也類也比也狀也謂之象

義者所以合宜

也名者所以命事也時者名有所當也似類比狀謂立法者必有所做做不徒然也

尺寸也繩墨

也規矩也衡石也斗斛也角量也謂之法

角亦器量之名凡此十二

事皆立政者所以為法也漸也順也靡也久也服也習也謂之化

漸謂

革物當以漸也順也靡也謂物順教而風靡也久也服也習也謂人習服教命之久予奪也險易

也利害也難易也開閉也殺生也謂之決塞

凡此十二事皆為政

者所以決斷而窒塞也

實也誠也厚也施也度也恕也謂之心術

凡此六者皆自心術生也

剛柔也輕重也大小也實虛也遠近也多

少也謂之計數

凡此十二事必計之以知其數也

不明於則而欲出號

令

明則然後可以出號令

獨立朝夕於運均之上擔竿而欲定其

末

均陶者之輪也立朝夕所以正東西也今均既運則東西不可準也擔舉也夫欲定末者必先靜其本今

既舉竿之本其末不定也

不明於象而欲論材審用猶絕長以為短

續短以為長

鶴脰非所斷鳧脰非所續也

不明於法而欲治民一衆

猶左書而右息之

息止也左手為書右手從而止之則無時成書矣

不明於化

而欲變俗易教猶朝揉輪而夕欲乘車不明於決塞而

欲毆衆移民猶使水逆流不明於心術而欲行令於人

猶倍招而必拘之

物有倍叛而招之者必有以慰悅之令其感服今反拘留之則彼適叛矣

不明於計數而欲舉大事猶無舟楫而欲經於水險也

故曰錯儀畫制不知則不可論材審用不知象不可和

民一衆不知法不可變俗易教不知化不可毆衆移民

不知決塞不可布令必行不知心術不可舉事必成不

知計數不可

右七法

百匿傷上威

百百官也言百官皆匿情為私則上威傷

姦吏傷官法姦民傷

俗教賊盜傷國衆

盜賊之人常欲損敗於物也

威傷則重在下

君威傷則

臣反得尊重

法傷則貨上流教傷則從令者不輯衆傷則百

姓不安其居重在下則令不行貨上流則官徒毀

官者既不

以德進但以貨成故官徒毀徒事也

從令者不輯則百事無功百姓不安

其居則輕民處而重民散

輕民謂為盜者用盜致富故處重民謂務農者為盜破產

故輕民處重民散則地不辟地不辟則六畜不育六畜

不育則國貧而用不足國貧而用不足則兵弱而士不

厲兵弱而士不厲

厲奮也

則戰不勝而守不固戰不勝而

守不固則國不安矣故曰常令不審則百匿勝官爵不

審則姦吏勝符籍不審則姦民勝刑法不審則盜賊勝

國之四經敗人君泄見危

謂常令官爵符籍刑法四者為政之經四者既敗則是君

泄其事君泄其事則其位危矣

人君泄則言實之士不進言實之士不

進則國之情偽不竭于上

下皆隱實言虛則是國情不竭于上

世主所貴

者實也所親者戚也所愛者民也所重者爵祿也亡君則不然致所貴非實也致所親非戚也致所愛非民也

致所重非爵祿也故不為重寶虧其命故曰令貴於寶

重寶而全命則當不為愛親危其社稷故曰社稷戚於

親社稷者身之存亡故不為愛人枉其法故曰法愛於人

法者崇替所由故不為重祿爵分其威故曰威重于爵祿

弁所愛而存其法威者人君所以服海內必不不通此四者則反於無有

得已寧散爵祿不可分威也不達於四者國非其故曰治人如治水潦治水潦者必峻其隄防也

國故曰反於無有

故曰治人如治水潦

治水潦者必峻其隄防也



養人如養六畜

養六畜者必致其開早堅其羈絆

用人如用草木

用草木者

時入山林輪轅不失其宜樵蘇各得其所

居身論道行理則羣臣服教百吏

嚴斷莫敢開私焉

君之於民其猶居身治之養之用之三者各得其宜論道而行理則無私不服

也論功計勞未嘗失法律也便辟左右大族尊貴大臣

不得增其功焉疏遠卑賤隱不知之人不忘其勞故有

罪者不怨上

罪得其人故不怨

愛賞者無貪心

賞不踰等故息其貪也

則

列陳之士皆輕其死而安難以要上事

賞罰不濫則立功要功之士知

其不誣故競而為之

本兵之極也

為兵之本其極要者在於明賞罰也

右四傷百匿

為兵之數存乎聚財而財無敵

存謂專立意存之君無財士不來故存意於聚

財則彼國之財不能敵也

存乎論工而工無敵

工者所以造軍之器用者也

存乎

制器而器無敵

器謂兵器

存乎選士而士無敵存乎政教而

政教無敵

政教軍中號令

存乎服習而服習無敵

服便也謂便習武藝

存

乎徧知天下而徧知天下無敵

徧知天下謂徧知其地形險易主將工拙士卒

勇怯存乎明於機數而明於機數無敵

機者發內而動外為近而成遠不疾

而速不行而至見其為之不知其所以為有數存焉於其間故曰機數也

故兵未出境而無

敵者八是以欲正天下財不蓋天下不能正天下

財謂貨財

不能蓋天下則無以正天下也

財蓋天下而工不蓋天下不能正天下

工蓋天下而器不蓋天下不能正天下

財雖蓋天下而工與器不能蓋

則無以正天下餘皆做此

器蓋天下而士不蓋天下不能正天下士

蓋天下而教不蓋天下不能正天下教蓋天下而習不

蓋天下不能正天下習蓋天下而不徧知天下不能正

天下徧知天下而不明於機數不能正天下故明於機

數者用兵之勢也大者時也小者計也

王者征伐能立大功者在於合

天時也至小者捷勝亦在人計謀也

王道非廢也而天下莫敢窺者王者

之正也

大寶之位神器也古今所共傳非有贊廢而天下莫敢窺窬者以王者當樂推之運應天人之

正衡庫者天子之禮也

衡者所以平輕重庫者所以藏寶物不令外知者也言王者用

心常當準平天下既知輕重審用於心無令長耳目者所得此則天子之禮然也

是故器成卒

選則士知勝矣

選謂簡其精練

徧知天下審御機數則獨行而

無敵矣所愛之國而獨利之所惡之國而獨害之則令

行禁止是以聖王貴之

貴謂貴兵

勝一而服百則天下畏之

矣立少而觀多則天下懷之矣

立少謂興七國雖少天下共觀之故曰觀多桓

公教邢遷衛用此術也或曰觀當為勸

罰有罪賞有功則天下從之矣故

聚天下之精財論百工之銳器春秋角試以練精銳為

右

右上也

成器不課不用不試不藏

兵器雖成未經課試則不用不藏

收

天下之豪傑有天下之駿雄故舉之如飛鳥動之如雷  
電發之如風雨莫當其前莫害其後獨出獨入莫敢禁  
圍成功立事必順於禮義故不禮不勝天下不義不勝  
人故賢知之君必立於勝地故正天下而莫之敢御也

右為兵之數

若夫曲制時舉不失天時

制雖委曲順天而舉不失天時也

毋曠地利

其數多少其要必出於計數

曠空地天之所覆空地謂山河陂澤所以營作而興

利者也必計數其多少之要然後度材而用之

故凡攻伐之為道也計必先定

于內然後兵出乎境計未定于內而兵出乎境是則戰

之自勝攻之自毀也

自勝謂自勝於已其敗可知也

是故張軍而不能

戰圍邑而不能攻得地而不能實三者見一焉則可破

毀也故不明于敵人之政不能加也

不明敵故未可加兵

不明于

敵人之情不可約也

不明敵情未可約士約誓

不明于敵人之將不

先軍也不明于敵人之士不先陣也是故以衆擊寡以

治擊亂以富擊貧以能擊不能以教卒練士擊敵衆白

徒

白徒謂不練之卒無武藝

故十戰十勝百戰百勝故事無備兵無

主則不蚤知

既無備無主故敵來攻不能先知之

野不辟地無吏則無蓄

積官無常下怨上而器械不功

功謂堅利

朝無政則賞罰不

明賞罰不明則民幸生

僥倖以偷生也

故蚤知敵人如獨行

蚤知

敵人則有以備之敵人望風自退故曰獨行也

有蓄積則久而不匱器械功則

伐而不費賞罰明則人不幸人不幸則勇士勸之故兵

也者審於地圖謀十官

地圖謂敵國險易之形軍之部置十官必伍什則有長故曰十

官又須謀得其人也

日量蓄積齊勇士徧知天下審御機數兵主

之事也故有風雨之行故能不遠道里矣

行疾如風雨故不以道里

為遠

有飛鳥之舉故能不險山河矣

輕捷如飛鳥故不以山河為險

有雷

電之戰故能獨行而無敵矣

雷電天之威怒故莫敢為敵

有水旱之

功故能攻國救邑

謂其功可以為彼水旱

有金城之守故能定宗

廟育男女矣有一體之治故能出號令明憲法矣

謂上下同

心其猶一體

風雨之行者速也飛鳥之舉者輕也雷電之戰



者士不齊也

懼雷電之威故彼士不齊

水旱之功者野不收耕不獲

也

能令彼有水旱故不得使收穫也

金城之守者用貨財設耳目也

貨財

所以養敢死之士耳目所以聽鄰國之動靜令必知之

一體之治者去奇說禁雕

俗也

奇說謂謠誑之言雕俗謂浮偽之俗

不遠道里故能威絕域之民不

險山河故能服恃固之國獨行無敵故令行而禁止故

攻國救邑不恃權與之國故所指必聽

雖有權與之國不顧而恃之權

與謂權為親與也

定宗廟育男女天下莫之能傷然後可以有

國制儀法出號令莫不嚮應然後可以治民一衆矣

右選陳

版法第七

選擇政要載之於版以為常法

經言七

凡將立事

主經國之事

正彼天植

謂順天道以種植必令得其正

風雨無違

君道不虧則風雨無違也

遠近高下各得其嗣

高下猶多少也謂君之賦稅因其遠近之

別以多少之差輕重合宜故可嗣之以常行嗣續也

三經既飭君乃有國

三經謂上天植

風雨高下也是三者既以飭整故君可以有國也

喜無以賞怒無以殺喜以賞

怒以殺怨乃起令乃廢驟令不行民心乃外

有外叛之心也

外

之有徒禍乃始牙

徒謂黨與也外叛者有黨與禍由是生故曰始牙

衆之所忿

置不能圖

衆忌難犯故必置之誰能圖之

舉所美必觀其所終

凡人之情靡不

有初鮮克有終故須觀之

廢所惡必計其所窮

蜂蠆有毒故必計其所窮知困獸猶鬪其

所終將何為也

慶勉收敬以顯之

人有敬則慶勉以顯之也

富祿有功以

勸之

人之有功則富祿以勸之

爵貴有名以休之

賢者有名則爵貴以休之

兼愛

無遺是謂君心必先順教萬民鄉風

上之教敬有功名之士必爵祿順而

與之所以教之急也如此則民鄉風而從化

旦暮利之衆乃勝任

有功名之士既旦暮

得利衆自厲而勝任

取人以已成事以質

將欲取人必先審已才略能用彼不質謂準的

將欲成事必先立其準的事不違質然後為善

審用財慎施報察稱量故用財

不可以嗇用力不可以苦用財嗇則費

嗇于用財不以賞賜則立功之

士懈怠敵人來侵其費更多嗇怯

用力苦則勞民不足令乃辱

民不足則令不

行故辱也

民苦殃令不行施報不得禍乃始昌禍昌不寤民

乃自圖

謀為叛已

正法直度罪殺不赦

夫正直之法度罪殺有過終不免赦

殺

僂必信民畏而懼武威既明令不再行頓卒怠倦以辱

之頓頓卒猶困苦其有怠倦不動則困苦以辱

罰罪有過以懲之殺僂犯禁以

振之植固不動倚邪乃恐

言執法者必當深植而固守則不可動移若乃頓倚而邪

則法亂而身危故可恐也

倚革邪化令往民移

既能正倚化邪歸於正直如此化出令纔

往則民移

法天合德

天之資始無有私德

象地無親

地之資生無所親私

參於日

月

日月無私耀也

伍於四時

賞以春夏刑以秋冬

悅在施有

將悅於下在於施無全有

衆在廢私

將欲齊衆在於廢私

召遠在修近

修近則遠者至

閉禍在除怨

除怨則禍端塞

修長在乎任賢

任賢則國祚長

高安在乎同利

與下同利則高

安位

管子卷二

欽定四庫全書

管子卷三

唐房玄齡注

幼官第八

幼始也陳從始輔官齊政之法

經言八

若因夜虛守靜人物人物則皇

言欲候氣聽聲以知凶吉必因夜虛之時守其

安靜以聽候人物此時人物則皇暇故吉凶之驗不妄

五和時節

土生數五土氣和則君順時節

而布 政 君服黃色味甘味聽宮聲

此土王之時故服黃味甘聽宮也然土雖均王

四季而正位在六月也

治和氣

土主和故治和氣

用五數飲於黃后之井

中央以保獸之火爨

保獸謂淺毛之獸虎豹之屬

藏溫濡

藏謂包之在心居之

所藏者溫和濡

行毆養

謂禽獸之屬能為苗害者時毆逐之所以養嘉穀也

坦氣

修通

坦平也平土政則其氣修通

凡物開靜形生理常至命

凡土王之時所

生之物但開通安靜則其形自生既循理之常則無殘盡於所賦之命也

尊賢授德則帝

帝者

之臣其實師也故尊賢授德則可為帝也

身仁行義服忠用信則王

服行審謀

章禮選士利械則霸

章明

定生處死謹賢修伍則衆

生者安定

之死者處置之斂葬其柩

信賞審罰爵材祿能則強

有材者爵之有能者祿之

計

凡付終務本飭末則富

凡謂都數也付終謂財日月既終付之後人

明法審



數立常備能則治

常謂五常也備能謂才能之士備有之

同異分官則安

同異之職分官而治

通之以道畜之以惠親之以仁養之以義報

之以德結之以信接之以禮和之以樂期之以事攻之

以官

攻治

發之以力威之以誠一舉而上下得終

謂初會諸侯上

下得終其禮自此至九舉說九合諸侯之所致

再舉而民無不從三舉而地辟

散成

成謂諸侯自盟要不事于齊至三會則諸侯散其成而朝齊

四舉而農佚粟十

四會之後徭役減者故農人佚樂而粟得十全

五舉而務輕金九

五會之後兵戰既息事務

轉輕而金得九分一以供官也

六舉而絜知事變

絜圓度也胡結反

七舉而外

內為用

外謂諸侯

八舉而勝行威立九舉而帝事成形

九會之後

威行海內雖居侯伯帝王之事既以成形

九本搏大人主之守也

自九本已下管氏但

舉其目或有數在於他篇但此書多從散佚無得而知然九本所以搏擊強大故人主守之

八分有

職卿相之守也七官飾勝備威將軍之守也六紀審密

賢人之守也五紀不解庶人之守也動而無不從靜而

無不同

強動弱必從強靜弱必同

治亂之本三卑尊之交四富貧之

終五盛衰之紀六安危之機七強弱之應八存亡之數

九練之以散羣備署

備猶曹也凡上之諸數既已精練然後散之於衆使備曹署著其名

以司  
凡數財署數謂國用之殺僂以聚財或因亡國或

籍沒其財故曰勸勉以選衆使二分具本使上之備署

事各具其名藉之本則財發善必審於密執威必明於

中發善謂行賞此居圖方中此立時之政管氏別五其

春行冬政肅肅寒也冬氣行秋政雷春陽秋陰行夏

政闢春既陽夏又陽陽十二地氣發戒春事自此以下

且經秦焚書或為煨燼無得而詳焉闕之以待能者

十二小邠出耕十二天氣下賜與十二義氣至修門閭

十二清明發禁十二始卯合男女十二中卯十二下卯

三卯同事

謂三卯所  
用事同他皆  
做此

八舉時節

木成數八木氣舉  
君則順時節布政

君服青色味酸味聽角聲

此木王之時故  
服青味酸聽角

治燥氣

春多風而

早故治燥氣

用八數

八亦木成數也

飲於青后之井

東方井

以羽獸之

火爨

羽獸南方朱鳥用南方之火故曰羽獸之火

藏不忍行毆養坦氣修通

凡物開靜形生理合內空周外

春主仁故所藏者不忍之理合聚於內出空於

外強國為圉弱國為屬

強國所以禁禦弱國弱國固然也

動而無不從

靜而無不同

強動弱必從強靜弱必同

舉發以禮時禮必得

強國舉發必當

以禮時也禮和好不基貴賤無司事變日至鄰國和好

也必得其宜之位無司存如此則事此居於圖東方方外夏行春政

變日至無寧居基漸寒氣肅殺重則雨電其災重則雨

風春箕宿行冬政落故凋落也行秋政水秋畢宿十二小郢至德十二絕氣下下爵賞

十二中郢賜與十二中絕收聚十二大暑至盡善十二

中暑十二小暑終三暑同事七舉時節火成數七火氣

而布君服赤色味苦味此火王之時故聽羽聲羽北方

政服赤味苦也王之時不聽徽而聽七亦火治陽氣用七數之成數飲於赤后

之井

南方井也

以毛獸之火爨

毛獸西方白虎用西方之火故曰毛獸之火

藏薄

純

盛陽之性失在奢縱故所藏者省薄純素也

行篤厚

陽性寬和故行篤厚

坦氣修通

凡物開靜形生理

物形既生自然修理而長育也

定府官明名分而審

責於羣臣有司則下不乘上賤不乘貴法立數得而無

比周之民則上尊而下卑遠近不乖此居於圖南方方

外秋行夏政葉

盛陽氣乘之故卉木生葉

行春政華

少陽氣乘之故卉木更生華

行冬政耗

盛陰肅殺故虛耗也

十二期風至戒秋事十二小卯薄

百爵十二白露下收聚十二復理賜與十二始節賦事

十二始卯合男女十二中卯十二下卯三卯同事九和

時節

金成數九金氣和君則順時節而布政

君服白色味辛味聽商聲

此

王之時故服白味辛聽商

治濕氣

秋多霖雨水故治濕

用九數

九亦金之成數

飲於白

后之井

西方井

以介蟲之火爨

介蟲北方玄武用北方之火故曰介蟲之火

藏

恭敬

金性廉潔故所藏者恭敬也

行搏銳

兌金性勁銳時方肅殺故曰以勁銳搏擊所以順殺

氣也坦氣修通凡物開靜形生理間男女之畜

男女之畜有内外之

異故須間之也

修鄉閭之什伍

殺氣方至可以出師征伐故修什伍

量委積之多

寡定府官之計數養老弱而勿通

老少異糧故其養勿通

信利周

而無私

申布秋利既令周徧無得有私

此居於圖西方方外冬行秋政

霧

秋多陰霧

行夏政雷

盛陽乘盛陰故雷也

行春政烝泄

少陽乘陰故烝泄也

十

二始寒盡刑十二小榆賜予十二中寒收聚十二中榆

大收十二寒至靜十二大寒之陰十二大寒終三寒同

事六行時節

水成數六水氣行君則順時節而布政也

君服黑色味鹹味

此水王之時故服黑味鹹

聽徵聲

不聽羽而聽徵者亦所以抑盛陰也

治陰氣

不治則盛陰太

過太過則治陰氣也

用六數

六亦水之成數

飲於黑后之井

北方井也

以鱗獸

之火爨

鱗獸東方青龍也用東方之火故曰鱗獸之火

藏慈厚

君人者好生惡殺故於刑殺之



時藏於慈厚所以示其不忍也行薄純冬物朴素故坦氣修通凡物開

靜形生理器成於僂冬行刑之時教行於鈔鈔末也冬

末歲之將終也動靜不記行止無量記動靜則戒審四時以別

息息生也四時生物各異出入以兩易出入既異又並

也易明養生以解固固謂護怯也生既須審取予以總

之又恐所養過時故審取一會諸侯令曰非玄帝之命

毋有一日之師役玄帝北方之帝齊桓初會命諸侯不

之時毋得有一日之師役一日尚不可況多乎再會諸侯令曰養孤老食常疾

收孤寡三會諸侯令曰田租百取五

百分取五分

市賦百取

二關賦百取一毋乏耕織之器四會諸侯令曰修道路

偕度量一稱數

偕同也稱斤兩也數多少也

藪澤以時禁發之

草木零落

然後入山林獮祭魚然後修澤梁也

五會諸侯令曰修春夏秋冬夏之常祭

食

常所祭常所食各有時物也

天壤山川之故祀必以時六會諸侯

令曰以爾壤生物共立官

立官主禮天之官也

請四輔

四輔即三公四輔也

所以助祭行禮將以禮上帝七會諸侯令曰官處四體而無禮

者流之焉莠命

官處謂處官也處官位而四體無禮者謂之莠命而流放焉莠命者謂穢亂教

命若莠之  
穢苗也

八會諸侯令曰立四義而毋議者尚之于玄

官聽于三公

四義者謂無障谷無貯粟無易樹子無以  
妾為妻諸侯能順命而無異議者則尚之

于天子玄官聽三  
公之錫命尚上也

九會諸侯令曰以爾封內之財物國

之所有為幣

為幣  
禮

九會大命焉出常至

謂上九會既出  
大令故天下諸

侯常至非此之外則朝  
聘之數遠近各有差也

千里之外二千里之內諸侯三

年而朝習命

因朝而  
習教命

二年三卿使四輔

諸侯三卿使天  
子四輔以受節

制也

一年正月朔日令大夫來修受命三公

習所受命  
於三公

二

千里之外三千里之內諸侯五年而會至習命

因會而  
至以習

命也 三年名卿請事二年大夫道吉凶十年重適入正禮

義重適謂承重也適諸侯之世子也 五年大夫請受變請所變更之教令也 三千

里之外諸侯世一至道路既遠故世一至 置大夫以為廷安其遠國大

夫則為置廷館每入共受命焉入共國所有因以受命 此居於圖

北方方外必得文威武官習勝之善勝敵者必得文德之威武藝之官與之

練習士卒則務時因勝之時是也務是因修不逆於理可以得勝也 終無方

勝之從始至終計出無方者勝 幾行義勝之庶幾行義者可以勝 理名實勝之

整理名實不謬 急時分勝之敗敵所得之物應受分者急分與之可以得勝 事

妄可以得勝

察伐勝之

伐功行賞之事必察有功不令無功者妄受可以得勝

行備具勝之

師

用兵必備其攻戰之具可以得勝

原無象勝之

奇計若神無象可原者勝

本定獨威

勝用師之本定能獨威者勝

定計財勝

計謀財用先審定者勝

定聞知勝

聞知敵謀

能審定者勝

定選士勝

精選士卒能審定者勝

定制祿勝

制祿亦與有功能審定者

勝也 定方用勝

異方所用各有不同能審定者勝也

定綸理勝

經綸之理能審定者勝也

定死生勝 定成敗勝 定依奇勝

所依奇策能審定者勝

定實虛勝

定盛衰勝 舉機誠要則敵不量

發舉兵機誠得其要則敵不能量也

用利

至誠則敵不校

用兵便利又能至誠則敵不敢校也

明名章實則士死節

明忠義之名章功勞之賢士則死節不求苟生

奇舉發不意則士歡用

奇謀之舉發彼

不意則士樂為用

交物因方則械器備

交質之物因方之有則器械備具也

因能

利備則求必得

因彼所能所利而以備之則所求必得

執務明本則士不

偷執所營之務明所為之本則士不苟且

備具無常無方應也

其所備具無有常者

所以應敵無方

聽於鈔故能聞未極

鈔深遠也所聽在於深遠故能聞於極理

視於

新故能見未形

未形者新事將起所視者在於新故見未形也

思於濬故能知

未始

未始者事之深濬者所思在深故知未始

發於驚故能知無量

發舉可驚故敵

不能量

動於昌故能得其寶

舉動昌盛故敵懼而輸寶也

立於謀故能

實不可故也

其所建立皆用深謀故常堅實不復衰故

器成教守則不遠道

里

器用完成教令堅守故欲往則至不憚道里之遠也

號審教施則不險山河

號

審悉教命施行則赴湯火而不顧豈險難於山河也

博一純固則獨行而無敵

博

而一行純而固則仰我如時雨散我如椒蘭誰能敵之

慎號審章則其攻不待

慎

今審旗章則攻者爭先登豈顧後而相待乎

權與明必勝則慈者勇

權謀明器必能

勝敵則慈仁者猶致勇奮況惡少哉

器無方則愚者智

器用無方應卒必備則愚者習而成

智況不愚乎

攻不守則拙者巧

我攻既妙彼不能守則拙者習而成巧況不拙乎

數

也動慎十號

兵既數動必慎十號九章等此有數在他篇

明審九章節習十

器善習五官謹修三官必設常主計必先定

軍之主將既必有常

軍之計謀亦須先定

求天下之精材

精材可以為軍之器用者

論百工之銳器

器成角試否臧收天下之豪傑有天下之稱材

稱材謂材稱其

所用也

說行若風雨發如雷電此居於圖方中

此中圖之副也旗

物尚青

木用事故尚青

兵尚矛

象春物之芒銳

刑則交寒害鈇

其行刑戮則於

初旦夜盡之交其時尚寒主春人不得已而行刑故離害而鈇禁鈇或為鈇

器成不守

器用既成

則敵不能圍守也

經不知

經法也用兵法敵不能知也

教習不著

我之教習敵不能著

著猶明著

發不意

其所舉發出敵不意

經不知故莫之能圍發不意故



莫之能應莫之能應故全勝而無害莫之能圍故必勝

而無敵四機不明不過九日而游兵驚軍

四機即上不守不知不著

不意障塞不審不過八日而外賊得間

障塞者所以防守要路也

由

守不慎不過七日而內有讒謀

由守所由而防守者

詭禁不修不

過六日而竊盜者起

詭禁所以禁詭常也

死亡不食不過四日而

軍財在敵

死亡者不享食鬼神必怨怒故軍財在敵

此居於圖東方方外

此東

圖之副也

旗物尚赤

火用事故尚赤

兵尚戟

象夏物之森聳

刑則燒交疆郊

其用刑則於疆郊焚燒而交也

必明其一

一謂號令不二

必明其將必明其政

必明其士四者備則以治擊亂以成擊敗數戰則士疲

數勝則君驕驕君使疲民則國危至善不戰用兵之善者其惟不

戰其次一之其次善者雖戰而號令一大勝者積衆積衆然後可以大勝勝無

非義者焉可以為大勝所以勝皆大義故成大勝也大勝無不勝也

此居於圖南方方外此南圖之副也旗物尚白金用事故尚白兵尚劍

象金性之利也刑則紹昧斷絕其用刑則繼晝之昧斷絕而戮之也始乎無端卒

乎無窮始乎無端道也卒乎無窮德也道不可量德不

可數不可量則衆強不能圖不可數則偽詐不敢鄉兩

者備施

兩者謂道德也

動靜有功畜之以道養之以德畜之以

道則民和養之以德則民合和合故能習習故能借

借謂

同為其事

借習以悉

悉盡也

莫之能傷也此居於圖西方方外

此西圖之副也

旗物尚黑

水用事故尚黑

兵尚脅盾

象時物之閉盾或署之於脅故曰脅

盾刑則游仰灌流

其用刑則游縱之所使仰藥死而既乃投之於灌流

察數而知

治審器而識勝明謀而適勝通德而天下定定宗廟育

男女

宗廟存則男女育也

官四分則可以立威行德制法儀出號

令

擇才授官四面分設

至善之為兵也非地是求也罰人是君也

至善之兵不求其地所以君可  
罰人若紂桀之人比屋可誅也  
立義而加之以勝至威

而實之以德守之而後修勝心焚海內

既獲敵人之國  
順而守之然後

修其法制如此則強勝  
之心可以焚灼於海內

民之所利立之所害除之則民

人從

立利除害  
則人從也

立為六千里之侯則大人從

既九會之  
後天子加

命立為侯伯面各三千里四方相距  
六千里大人謂天子三公四輔也

使國君得其治則

人君從會

國君謂天下  
同盟諸侯

請命於天地知氣和則生物從

謂郊祀天地神祇使之合德  
則四氣和可知故生物從之

計緩急之事則危危而無

難

緩急之事皆已計定則二者之危無所  
難緩急之事皆有可危之理故曰危危

明於器械之

利則涉難而不變察於先後之理則兵出而不困通於  
出入之度則深入而不危審於動靜之務則功得而無  
害著於取與之分則得地而不執謂不慎於號令之官怯執

則舉事而有功此居於圖北方方外此北圖之副也

### 幼官圖第九

中方本圖  
東方副圖

中方副圖  
南方本圖

東方本圖  
南方副圖

西方本圖  
西方副圖  
北方本圖  
北方副圖

### 經言九

若因處虛守靜人物則皇五和時節君服黃色味甘味  
聽宮聲治和氣用五數飲于黃后之井以保獸之火爨

藏溫濡行毆養坦氣修通凡物開靜形生理常至命尊  
賢授德則帝身仁行義服忠用信則王審謀章禮選士  
利械則霸定生處死謹賢修伍則衆信賞審罰爵材祿  
能則強計凡付終務本飾末則富明法審數立常備能  
則治同異分官則安通之以道畜之以惠親之以仁養  
之以義報之以德結之以信接之以禮和之以樂期之  
以事攻之以官發之以力威之以誠一舉而上下得終  
再舉而民無不從三舉而地辟散成四舉而農佚粟十

五舉而務輕金九六舉而絜知事變七舉而內外為用  
八舉而勝行威立九舉而帝事成形九本搏大人主之  
守也八分有職卿相之守也七官飾勝備威將軍之守  
也六紀審密賢人之守也五紀不解庶人之守也動而  
無不從靜而無不同治亂之本三界尊之交四富貧之  
終五盛衰之紀六安危之機七強弱之應八存亡之數  
九練之以散羣備署凡數財署殺侈以聚財勸勉以選  
衆使二分具本發善必審於密執威必明於中此居圖

方中

右中方本圖

必得文威武官習勝之務時因勝之終無方勝之幾行  
義勝之理名實勝之急時分勝之事察伐勝之行備具  
勝之原無象勝之本定獨威勝定計財勝定聞知勝定  
選士勝定制祿勝定方用勝定綸理勝定死生勝定成  
敗勝定依竒勝定實虛勝定盛衰勝舉機誠要則敵不  
量用利至誠則敵不枝明名章實則士死節竒舉發不



意則士歡用交物因方則械器備因能利備則求必得  
執務明本則士不偷備具無常無方應也聽於鈔故能  
聞無極視於新故能見未形思於濬故能知未始發於  
驚故能至無量動於昌故能得其寶立於謀故能實不  
可故也器成教守則不遠道里號審教施則不險山河  
博一純固則獨行而無敵慎號審章則其攻不待權與  
明必勝則慈者勇器無方則愚者智攻不守則拙者巧  
數也動慎十號明審九章飾習十器善習五官謹修三

官必設常主計必先定求天下之精材論百工之銳器  
器成角試否臧收天下之豪傑有天下之稱材說行若  
風雨發若雷電此居於圖方中

右中方副圖

春行冬政肅行秋政雷行夏政則閹十二地氣發戒春  
事十二小卯出耕十二天氣下賜與十二義氣至修門  
閹十二清明發禁十二始卯合男女十二中卯十二下  
卯三卯同事八舉時節君服青色味酸味聽角聲治燥

氣用八數飲於青后之井以羽獸之火爨藏不忍行毆  
養坦氣修通凡物開靜形生理合內空周外強國為圜  
弱國為屬動而無不從靜而無不同舉發以禮時禮必  
得和好不基貴賤無司事變日至此居於圖東方方外  
右東方本圖

旗物尚青兵尚矛刑則交寒害鈇器成不守經不知教  
習不著發不意經不知故莫之能圍發不意故莫之能  
應莫之能應故全勝而無害莫之能圍故必勝而無敵

四機不明不過九日而游兵驚軍障塞不審不過八日  
而外賊得間由守不慎不過七日而內有讒謀詭禁不  
修不過六日而竊盜者起死亡不食不過四日而軍財  
在敵此居於圖東方方外

右東方副圖

夏行春政風行冬政落重則雨電行秋政水十二小郢  
至德十二絕氣下下爵賞十二中郢賜與十二中絕收  
聚十二大暑至盡善十二中暑十二小暑終三暑同事

七舉時節君服赤色味苦聽羽聲治陽氣用七數飲  
於赤后之井以毛獸之火爨藏薄純行篤厚坦氣修通  
凡物開靜形生理定府官明名分而審責於羣臣有司  
則下不乘上賤不乘貴法立數得而無比周之民則上  
尊而下卑遠近不乖此居於圖南方方外

右南方本圖

旗物尚赤兵尚戟刑則燒交疆郊必明其一必明其將  
必明其政必明其士四者備則以治擊亂以成擊敗數

戰則士疲數勝則君驕驕君使疲民則危國至善不戰其次一之大勝者積衆勝而無非義者焉可以為大勝大勝無不勝也此居於圖南方方外

右南方副圖

秋行夏政葉行春政華行冬政耗十二期風至戒秋事十二小卯薄百爵十二白露下收聚十二復理賜予十二始前節第賦事十二始卯合男女十二中卯十二下卯三卯同事九和時節君服白色味辛味聽商聲治濕

氣用九數飲於白后之井以介蟲之火爨藏恭敬行搏  
銳坦氣修通凡物開靜形生理間男女之畜修鄉里之  
什伍量委積之多寡定府官之計數養老弱而勿通信  
利害而無私此居於圖西方方外

右西方本圖

旗物尚白兵尚劍刑則紹昧斷絕始乎無端卒乎無窮  
始乎無端道也卒乎無窮德也道不可量德不可數不  
可量則衆強不能圖不可數則為詐不敢鄉兩者備施

動靜有功畜之以道養之以德畜之以道則民和養之以德則民合和合故能習習故能借借習以恚莫之能傷也此居於圖西方方外

右西方副圖

冬行秋政霧行夏政雷行春政烝泄十二始寒盡刑十二小榆賜予十二中寒收聚十二中榆大收十二寒至靜十二大寒之陰十二大寒終三寒同事六行時節君服黑色味鹹味聽徵聲治陰氣用六數飲于黑后之井



以鱗獸之火爨藏慈厚行薄純坦氣修通凡物閒靜形  
生理器成於樛教行於鈔動靜不記行止無量戒審四  
時以別息異出入以兩易明養生以解固審取與以總  
之一會諸侯令曰非玄帝之命毋有一日之師役再會  
諸侯令曰養孤老食常疾收孤寡三會諸侯令曰田租  
百取五市賦百取二關賦百取一毋乏耕織之器四會  
諸侯令曰修道路偕度量一稱數毋征藪澤以時禁發  
之五會諸侯令曰修春秋冬夏之常祭食天壤山川之

故祀必以時六會諸侯令曰以爾壤生物共立官請四  
輔將以祀上帝七會諸侯令曰官處四體而無禮者流  
之焉莠命八會諸侯令曰立四義而無議者尚之于立  
官聽于三公九會諸侯令曰以爾封內之財物國之所  
有為幣九會大令焉出常至千里之外二千里之內諸  
侯三年而朝習命二年三卿使四輔一年正月朔日令  
大夫來修受命三公二千里之外三十里之內諸侯五  
年而會至習命三年名卿請事二年大夫通吉凶七年

重適入正禮義五年大夫請變三千里之外諸侯世一至置大夫以為廷安入共受命焉此居於圖北方方外

右北方本圖

旗物尚黑兵尚脅盾刑則游仰灌流察數而知治審器而識勝明謀而適勝通德而天下定定宗廟育男女官四分則可以立威行德制法儀出號令至善之為兵也非地是求也罰人是君也立義而加之以勝至威而實之以德守之而後修勝心焚海內民之所利立之所害

除之則民人從立為六千里之侯則大人從使國君得  
其治則人君從會請命於天地知氣和則生物從計緩  
急之事則危危而無難明於器械之利則涉難而不變  
察於先後之理則兵出而不困通於出入之度則深入  
而不危審於動靜之務則功得而無害也著於取與之  
分則得地而不執慎於號令之官則舉事而有功此居  
於圖北方方外

右北方副圖

五輔第十

謂六典七體八經五務三度此五者可以輔弼國政也

外言一

古之聖王所以取明名廣譽厚功大業顯於天下不忘

於後世非得人者未之嘗聞

不得於人而能使名譽顯當時功業流後世者則未

嘗聞暴王之所以失國家危社稷覆宗廟滅於天下非失

人者未之嘗聞

不失於人而能使失國覆宗者亦未嘗聞

今有土之君皆處

欲安動欲威戰欲勝守欲固大者欲王天下小者欲霸

諸侯

言諸侯欲大利則王天下欲小利則霸諸侯也

而不務得人是以小者兵

挫而地削大者身死而國亡

既不務得人故必致禍小則地削大則國亡

故

曰人不可不務也

常務得之於人

此天下之極也曰然則得人

之道莫如利之利之道莫如教之以政故善為政者

田疇墾而國邑實朝廷閒而官府治公法行而私曲

止倉廩實而囹圄空賢人進而奸民退其君子上中正

而下詔諛其士民貴武勇而賤得利

賤苟得之利也

其庶人好

耕農而惡飲食

惡費用之飲食

於是財用足

好耕農故財用足

而飲食

薪菜饒

省費用則薪菜饒

是故上必寬裕而有解舍

解放也舍免也

下

必聽從而疾怨上下和同而有禮義故處安而動威

戰勝而守固是以一戰而正諸侯不能為政者田疇荒

而國邑虛朝廷兇

小人競進故兇

而官府亂

小人用法故亂

公法廢而

私曲行倉廩虛而囹圄實賢人退而姦民進其君子上

諂諛而下中正其士民貴得利而賤武勇其庶人好飲

食而惡耕農於是財用匱而食飲薪菜乏上彌殘苟

居上位者

小人故殘賊苟且也

而無解舍下愈覆鷲而不聽從

覆察也鷲疑也上既殘苟

而不舍故下伺察而懷疑鷲勅吏反

上下交引而不和同

上引下以供御下引上以恩覆

二俱不得故不和同也

故處不安而動不威戰不勝而守不固是

以小者兵挫而地削大者身死而國亡故以此觀之則

政不可不慎也德有六興義有七體禮有八經法有五

務權有三度所謂六興者何曰辟田疇利壇宅

壇堂基

修

樹藝勸士民勉稼穡修墻屋此謂厚其生

上六者可以厚養其生也

發伏利

利人之市積久隱伏者發而用之

輸帶積

帶貯積也

修道途便闕事

謂所置闕市皆令要便也

慎將宿

將送貨則必慎止宿

此謂輸之以財

上五者皆生財

之術故曰輸財所以納財於民

導水潦利陂溝決潘渚

潘溢也渚潘溢者疏決之令通

潘音翻

潰泥滯

泥塗為滯者亦潰決之令通也

通鬱閉

鬱閉亦謂川潰有道塞者

慎津



梁此謂遺之以利

上之六者所以遺利於民

薄徵斂輕征賦弛刑罰

赦罪戾宥小過此謂寬其政

上之五者所以寬裕其政

養長老慈幼

孤恤鰥寡問疾病弔禍喪此謂匡其急

上之五者所以救民之急

衣

凍寒食飢渴匡貧窶賑罷露

疾憊裸露者有以振救之

資乏絕此謂

賑其窮

上之五者所以賑民之窮乏

凡此六者德之興也六者既布

則民之所欲無不得矣夫民必得其所欲然後聽上聽

上然後政可善為也故曰德不可不興也曰民知德矣

而未知義然後明行以導之義

行即七義

義有七體七體者

何曰孝悌慈惠以養親戚恭敬忠信以事君上中正比

宜以行禮節

比合也行既中正而又合宜也

整齊搏誦以辟刑僂

搏節也言

自節而卑屈也

織嗇省用以備飢饉

織細也嗇吝也既細又吝故財用省也

敦蒙

純固以備禍亂

蒙厚也音莫江反

和協輯睦以備寇戎凡此七

者義之體也夫民必知義然後中正中正然後和調和調乃能處安處安然後動威動威乃可以戰勝而守固故曰義不可不行也曰民知義矣而未知禮然後飾八經以尊之禮所謂八經者何曰上下有義貴賤有分長

幼有等貧富有度凡此八者禮之經也故上下無義則

亂貴賤無分則爭長幼無等則倍

倍非度也

貧富無度則失

失其節制

上下亂貴賤爭長幼倍貧富失而國不亂者未之

嘗聞也是故聖王飭此八禮以導其民八者各得其義

則為人君者中正而無私為人臣者忠信而不黨為人

父者慈惠以教為人子者孝悌以肅為人兄者寬裕以

誨為人弟者比順以敬

和比

為人夫者敦蒙以固為人妻

者勸勉以貞夫然則下不倍上臣不殺君賤不踰貴少

不陵長遠不間親新不間舊小不加大淫不破義凡此  
八者禮之經也夫人必知禮然後恭敬恭敬然後尊讓  
尊讓然後少長貴賤不相踰越少長貴賤不相踰越故  
亂不生而患不作故曰禮不可不謹也曰民知禮矣而  
未知務然後布法以任力任力有五務五務者何曰君  
擇臣而任官大夫任官辯事辯明也能明所任之事也官長任事守  
職士修身功材材謂藝能士既修身必於藝能有功也庶人耕農樹藝君  
擇臣而任官則事不煩亂大夫任官辯事則舉措時

官長任事守職則動作和士修身功材則賢良發庶人  
耕農樹藝則財用足故曰凡此五者力之務也夫民必  
知務然後心一心一然後意專心一而意專然後功足  
觀也故曰力不可不務也曰民知務矣而未知權然後  
考三度以動之所謂三度者何曰上度之天祥下度之  
地宜中度之人順此所謂三度故曰天時不祥則有水  
旱地道不宜則有飢饉人道不順則有禍亂此三者之  
來也政召之曰審時以舉事

時則天祥地宜人順之  
時也得其時則事可成以

事動民

事成則民可動

以民動國

民昌則國可動

以國動天下

國強則天下可

動也

天下動然後功名可成也故民必知權然後舉錯得

權謂能知三度

舉錯得則民和輯民和輯則功名立矣故曰權

不可不度也故曰五經既布然後逐姦民詰詐偽屏讒

慝而毋聽淫辭毋作淫巧若民有淫行邪性樹為淫辭

作為淫巧以上諂君上而下惑百姓移國動眾以害民

務者其刑死流

大罪死小罪流

故曰凡人君之所以內失百姓

外失諸侯兵挫而地削名卑而國虧社稷滅覆身體危

殆非生於諂淫者未之嘗聞也何以知其然也曰淫聲  
諂耳淫觀諂目耳目之所好諂心心之所好傷民民傷  
而身不危者未之嘗聞也曰實墾虛墾田疇修牆屋則  
國家富節飲食撙衣服則財用足舉賢良務功勞布德  
惠則賢人進逐姦人詰詐僞去讒慝則奸人止修飢饉  
救災害賑罷露則國家定明王之務在於強本事去無  
用然後民可使富

本事謂農桑也  
無用謂未作也

論賢人用有能而民

可使治薄稅斂毋苟於民

謂無苟  
取於民

待以忠愛而民可使

親三者霸王之事也事有本而仁義其要也今工以巧

笑而民不足於備用者其悅在玩好

君悅玩好則民務未作故備用不足

農以勞矣而天下飢者其悅在珍怪方丈陳於前

方丈陳前

則役用廣故農勞而不免於飢

女以巧矣而天下寒者其悅在文繡

君悅

文繡則女工傷而天下寒

是故博帶黎

黎博帶以就袂也黎割也

大袂列

列大袂以從小

文繡染

染文繡為純色

刺鏤削

削刻鏤為純素

雕琢采

采雕琢為純縵

關幾而

不征

幾察也但使察非常而不征賦也


市鄠而不稅

鄠市中置物處但籍知其數不稅數

古之良工不勞其知巧以為玩好是故無用之物守法



者不失  
或為無用物守法者必  
得而誅之不使漏失也



管子卷三